

A dithakadu ke diphologolo tsa nnete?

E kwadilwe ke Lesley Beake | E tshwantshitswe ke Tamsin Hinrichsen

Sekolo se tswile. Ke nako ya go ya gae.

Samuel le Maryanne ba tsamaya mmogo, ba tsamaya mmogo.

“A dithakadu ke diphologolo tsa nnete?”

Samuel a botsa Maryanne.

“Ee.”

“A ke ditshoswane?”

“Nnyaa.”

“A ke dibera?”

“Nnyaa.”

Bana ba tsamaya mmogo, ba tsamaya mmogo.

“A dithakadu di dikgolo?”

“Ee.”

“A di tiile?”

“Ee.”

Bana ba tsamaya mmogo, ba tsamaya mmogo.

“A di tlaa re ja?”

“Nnyaa.”

“Di jang?”

“Ditshoswane.”



Bana ba tsamaya mmogo, ba tsamaya mmogo.

“A dithakadu di dula mo ditlhareng?”

“Nnyaa.”

“A dithakadu di a fofa jaaka dikoko?”

“Nnyaa.”

Bana ba tsamaya mmogo, ba tsamaya mmogo.

“A dithakadu di dula le batho?”

“Nnyaa.”

“A dithakadu di rata mamepe?”

“Nnyaa.”

Maryanne a ema. Samuel le ena a ema, fela e seng ka bonako. A latela Maryanne. O lebega a tenegile.

“A dithakadu...”

Maryanne a mo tshwara ka seatla.

“EMISA GO BOTSA DIPOTSO!”

“Fela...”

“EMISA!”

Maryanne a bontsha Samuel kago e nnye.

Letshwao ke lele mo kagong.

LAEBORARI.

Samuel a lebelela Maryanne.

“A ba itse sengwe ka ga dithakadu kwa teng kwa?”

“Ee.”

Samuel a lebelela laeborari.

“A nka tsena?”

“Ee.”

Samuel a tsena. Laeborari e ne e tletse ka dibuka.

Go ne go le makgolokgolo a dibuka. Gongwe go ne go na le dikete tsa dibuka. Samuel o tlaa bona jang buka e e buang ka dithakadu?

“Ee?” ga bua monna yo o bonolo.

“A o na le buka e e buang ka ga dithakadu?”


Modiri wa mo laeborari a nyeba.

“Ee.”



Monna yo o bonolo a tla ka buka. Samuel a dula mo tafoleng go e lebelela.

- Dithakadu di dikgolo – di dikgolwane mo bontsing jwa dintšwa.
- Dithakadu di ja ditshoswane le ditshenekegi tse dingwe.
- Dithakadu di itirela bonno ka fa tlase ga lefatshe.
- Dithakadu di itse go epa thata.
- Dithakadu di dula kwa majannyeng a Aforika.
- Dithakadu ga di na meno.
- Dithakadu gape di bidiwa dikolobe.
- Dithakadu di tlhagelela fela bosigo.



Samuel a nna a akanya. Monna yo o bonolo a dira fothokhopi ya setshwantsho sa thakadu. A se neela Samuel. Samuel o sa ntse a akanya.

“Dithakadu di tlhagelela fela bosigo,” Samuel a rialo.
“Ee.”

“Jaanong re itse jang ka tsona?”
Monna yo o bonolo a nyeba.

“Babatlisisi ba di lebeletse sentle ka kelotlhoko. Batho ba ne ba seta dikhemera go di tsaya ditshwantsho bosigo. Batho ba kwala dibuka moo ba re bolelelang ka ga tsona.”

Samuel a akanya ka se. “Fela *bana* bona ba itse jang ka ga dithakadu?”

“Ba botsa dipotso!”

Samuel le Maryanne ba ya gae mmogo. Samuel o ne a didimetse thata. O ne a akantse ka ga dithakadu. O ne a akanya ka ga dilo tsotlhe tse a di itseng ka tsona.

A eletsa e kete a ka bona thakadu.



“Maryanne?” a bitsa.

“Ee.”

“Ke kopa re seka ra robala bosigo, ke batla go bona dithakadu. A re ka tsaya totšhe go bona gore a go ka tswa go na le dithakadu dingwe fano? A re ka batla go bona gore a go ka tswa go na le mesima ya dithakadu moo di nnang gona? A re ka dira jalo? A re ka dira jalo?”

“Nnyaa.”

A dithakadu ke diphologolo tsa nnete?

E kwadilwe ke Lesley Beake • E tshwantshitswe ke Tamsin Hinrichsen

Megopolo e re ka buang ka yona

Samuel o ne a ntse a batlana le buka e e buang ka diphologolo tse di bidiwang dithakadu. Ke dibuka dife tse o ratang go di bala?

Samuel a ka bo a utlwile jang gape ka dithakadu? Gantsi o bona jang tshedimosetso?



Se se bonwang ka matlho

Samuel o ne a na le kgatlhego e kgolo thata ka dithakadu. Phologolo e o e ratang thata ya naga ke efe? Dira setshwantsho sa yone. Kwala leina la phologolo eo kafa tlase ga setshwantsho kgotsa o kope mongwe go go direla jalo.



Go Bala

A o ka dirisa tshedimosetso e e mo kgannyeng eno go kwala lenaane la dilo tse di "boammaaruri" le tse di "maaka" ka dithakadu?




Go Kwala

Samuel o boditse dipotso tse dintsi ka dithakadu ka gonne a ne a kgatlhegela go itse ka tsone. Kwala lenaane la dipotso di le robedi go ya go di le lesome tse o kgatlhegela go bona dikarabo tsa tsone.



Botaki

Dirisa mmopa kgotsa tlhabego ya go tshameka go dira thakadu.



Tiragatso

Dira jaaka eketse go na le motlotlo fa gare ga Samuel le Maryanne mo karolong ya leinane leno pele ga ba tsena kwa laeboraring.

